

d'autre eau, ou vne autre fontaine pour vous secourir?

*LE CHAPITRE DE LA PLUME,
contenant cinquante-deux versets,
escrit à la Meque.*

Le Bedaoui intitule ce chapitre de la lettre O noun, n, & dit que c'est à dire Baleine ou grand poisson; Quelques autres Docteurs disent que O noun, n, est le nom de l'ancre ou de la table, sur laquelle les Anges escriuent les commandemens de Dieu, les autres assurent qu'il signifie escriptoire, mais vne bonne partie des Docteurs Mahometans intitulent ce Chapitre de la Plume.

AV nom de Dieu clement & misericordieux. Je iure par la plume & par tout ce qui est escrit, que tu n'es pas demoniacle par la grace de ton Seigneur, tu auras vne recompense infinie, Dieu t'a creé d'vne creation haute & tres-illustre. Tu cognoistras à l'aduenir, & les infidelles aussi cognoistront vn iour ceux d'entre vous qui sont ignorans. Certainement ton Seigneur cognoit ceux qui sont deuoyez, & ceux qui suiuent le droict chemin; N'obeys pas aux impies, ils souhaitent que tu sois plus indulgent en-

uers eux, & eux plus doux enuers toy, N'obey pas à ces méteurs ignominieux, bauars, pecheurs, seducteurs & meschás, pleins de tresors & d'enfans; lors qu'on leur raconte les mysteres de la foy, ils disent que ce n'est que de vieilles fables de l'antiquité, nous mettrós sur leur nés vne marque de honte & d'ignominie; Nous les auons esprouez comme les Iardiniers quand ils ont resolu le soir de couper le matin ensuiuant des fruiets de leur iardinage pour leur refection, & n'ont pas dit, s'il plaist à Dieu; la nuit lors qu'ils dormoient Dieu a enuoyé le feu dans leurs iardinages qui les a bruslés, le matin ils se sont appellez, & ont dit, venez pour mettre ordre à vostre iardinage si vous en voulez cueillir des fruiets, ils ont crû que les pauures y vouloient entrer, ils ont accouru (pour les chasser,) & ont trouué leurs fruiets tous noirs & leurs iardinages bruslez: Alors ils ont dit, nous sommes deuoyez, nous sommes pecheurs; vn d'entr'eux a dit, qu'il faut louer Dieu; alors ils ont dit, loué soit Dieu, nous sommes de grands pecheurs, ils se sont approchez les vns des autres, & ont fait leur plainte entr'eux; ils ont dit, le malheur est sur nous, nous estions dans vne grande erreur, peut-estre qu'à l'aduenir Dieu nous donnera plus de bien que ne vaut ce que nous auons perdu, il faut souhaiter sa grace, ainsi Dieu chastie en terre qui bon luy semble, mais les tourmens del'autre monde sont beaucoup plus grieus, ceux qui ont sa crainte deuant les yeux demeureront dans des iardins pleins de delices; Traiteray-ie les bons comme

les meschans ? comme le pouuez-vous iuger ? auez vous vn liure où vous lifiez ce qui vous agréé ? vous aués nous promis quelque contentement au iour du Jugement ? auez vous ce iour ce que vous vous estes promis à vous-mesmes ? Demande leur qui sera caution de leur croyance, leurs Idoles & leurs compagnons seront-ils leur caution ? qu'ils les fassent venir s'ils sont veritables. Souuiens-toy du iour que les pechez seront découuerts, & qu'on ordonnera aux impies d'adorer Dieu ; mais ils ne le pourront pas voir, leurs yeux seront troublez de peur, & leur veüe couuerte de honte. On leur ordonne dans le monde d'adorer sa diuine Majesté, mais ils ne le veulent pas faire, ie les chastieray peu à peu lors qu'ils y penserót le moins, ie differerai la punition de leurs crimes parce que ma colere est forte ; demande-tu aux hommes quelque recompense de tes predications, en sont-ils chargez de quelque depense ? ont-ils en leur pouuoir le liure où est escrit le futur pour y escrire ce qu'ils disent ? attens le jugement de ton Seigneur & ne sois pas comme celuy qui a esté englouty de la baleine. Il a inuoqué son Seigneur dans son affliction. Si son Seigneur ne luy eust enuoyé la grace, il ne seroit iamais venu sur la terre : lors qu'il s'est repenty de son peché son Seigneur luy a pardonné, & la mis au nombre des gens de bien. Les infidelles taschent de t'ébranler par leurs regards, & ce, par enuie, ils disent que tu es vn demoniacle lors qu'ils t'entendent lire l'Alcoran ; il n'a esté enuoyé que pour instruire le monde.